

MESYUARAT KEDUA, PENGGAJAL KEEMPAT
PARLIMEN KEEMPAT BELAS
2021

HARI SELASA : 7 DISEMBER 2021

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 1, 12 HINGGA NO. 40)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN DEWAN RAKYAT MESYUARAT
KEDUA, PENGGAL KEEMPAT
PARLIMEN KE EMPAT BELAS (2021)**

PERTANYAAN : LISAN

**DARIPADA : DATO' DR. MOHD KHAIRUDDIN BIN
AMAN RAZALI [KUALA NERUS]**

TARIKH : 7 DISEMBER 2021 [SELASA]

SOALAN

DATO' DR. MOHD KHAIRUDDIN BIN AMAN RAZALI [KUALA NERUS] minta **MENTERI ALAM SEKITAR DAN AIR** menyatakan kajian dan pelan perancangan pembangunan menyeluruh yang dibuat oleh pihak Kementerian bagi menyelesaikan masalah perparitan di Parlimen Kuala Nerus secara holistik untuk mengatasi isu banjir kilat dan banjir ketika musim moonsun timur laut atau musim tengkujuh.

JAWAPAN

Tuan Yang Di-Pertua,

1. Dalam usaha menyelesaikan masalah perparitan di Parlimen Kuala Nerus, Kementerian Alam Sekitar dan Air (KASA) telah melaksanakan tindakan penyelesaian jangka pendek dan jangka panjang.
2. Bagi penyelesaian jangka pendek, KASA telah menyalurkan peruntukan sebanyak RM40 ribu bagi menyelenggara 2 buah kolam takungan banjir di kawasan Parlimen Kuala Nerus pada tahun 2021.
3. Manakala bagi penyelesaian jangka panjang melibatkan pelaksanaan;
 - a. Kajian Pelan Induk Saliran Mesra Alam (PISMA) Daerah Kuala Terengganu dan Kuala Nerus, Terengganu. Kajian ini telah siap

NO. SOALAN : 1

pada 31 Oktober 2019. Kajian ini perlu dilaksanakan terlebih dahulu untuk mengenalpasti punca-punca kejadian banjir kilat yang berlaku dan sebagai rujukan dalam merancang infrastruktur saluran serta mengenalpasti langkah-langkah penyelesaian jangka pendek dan jangka panjang secara komprehensif bagi menangani kejadian banjir kilat.

- b. Projek Tebatan Banjir Kuala Terengganu (UMT) dan Kawasan Sekitar, Terengganu dengan kos keseluruhan projek berjumlah RM10 juta. Projek ini dijangka tender pada Mei 2022 dan siap sepenuhnya pada Ogos 2023; dan
- c. Projek di bawah Kementerian Pengajian Tinggi yang dilaksanakan JPS sebagai agensi teknikal, iaitu Projek Sistem Tebatan banjir dan Sistem Pencegahan Hakisan Pantai Universiti Malaysia Terengganu. Projek ini dijangka tender pada Januari 2022 dan siap sepenuhnya pada Mei 2024.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB TUAN FONG KUI LUN [BUKIT BINTANG]

TARIKH : 7 DISEMBER 2021 (SELASA)

SOALAN

Minta **MENTERI SAINS, TEKNOLOGI DAN INOVASI** menyatakan usaha Kementerian untuk membangunkan vaksin COVID-19 sendiri bagi keperluan negara supaya tidak bergantung sumber vaksin asing dalam melawan pandemik COVID-19.

JAWAPAN

Tuan Yang di-Pertua,

Untuk makluman Ahli Yang Berhormat,

1. Pada 28 Ogos 2021 yang lalu, Yang Amat Berhormat Perdana Menteri telah mengumumkan, antara fokus MOSTI yang utama adalah berkaitan penyelidikan dan pembangunan (R&D) bagi menghasilkan vaksin COVID-19. Hal ini kerana pandemik yang sedang dihadapi ini, berkemungkinan besar menjadi endemik iaitu kekal menjadi sebahagian daripada kehidupan harian masyarakat Malaysia.

2. Selain itu, mandat ini juga selaras dengan keputusan semasa Mesyuarat Majlis Sains Negara pada tahun 2020, yang bersetuju supaya sebuah Pelan Hala Tuju Pembangunan Vaksin Negara (PPVN) dibangunkan.

3. Objektif PPVN ini adalah untuk menjadikan Malaysia sebagai negara pengeluar vaksin manusia pada masa hadapan dan juga mengkaji keperluan vaksin-vaksin lain untuk rakyat negara ini.

4. Seterusnya, sebagaimana Yang Berhormat sedia maklum juga, Pelan Hala Tuju Pembangunan Vaksin Negara (PPVN) dan Institut Genom dan Vaksin Malaysia (MGVI) telah dilancarkan oleh Yang Amat Berhormat Perdana Menteri pada 1 November 2021 yang lalu. Penaiktarafan MGVI ini adalah sesuai dengan skop MGI yang fokus kepada penyelidikan genom dan biologi molekular dalam usaha penghasilan vaksin.

5. Sementara itu, MGVI melalui Institut Bioteknologi Kebangsaan Malaysia (NIBM) telah menandatangani sebanyak tujuh (7) Memorandum Persefahaman (MOU) berkaitan **penyelidikan dan pembangunan vaksin** bersama:

- i. Pharmaniaga Centre Sdn Bhd;
- ii. Malaysia Automotive Robotic and IoT Institute (MARii);

- iii. Tropical Infectious Diseases Research & Education Centre (TIDREC);
- iv. Universiti Putra Malaysia (UPM);
- v. Universiti Sains Malaysia (USM);
- vi. National Institute of Health (NIH, MOH); dan
- vii. Malaysian Investment Development Authority (MIDA)

6. MGVI juga dalam proses merangka strategi kolaborasi dengan empat (4) pusat kecemerlangan atau Center of Excellent (CoE) seperti yang dicadangkan di dalam PPVN, iaitu:

- i. Pusat Kecemerlangan Penemuan Vaksin
- ii. Pusat Kecemerlangan Kajian Praklinikal
- iii. Pusat Kecemerlangan Kajian Klinikal
- iv. Pusat Kecemerlangan Pembangunan Proses

7. Pada ketika ini, MGVI turut mengadakan perbincangan dengan **penerima Dana Penyelidikan Strategik (SRF)** berkaitan vaksin manusia untuk menempatkan penyelidik di MGVI agar lebih ramai dapat dilatih dan menyediakan penyelidik pelapis berkaitan vaksin di masa hadapan.

8. Tambahan kepada usaha-usaha pembangunan vaksin dalam negara, Kerajaan juga melalui MOSTI turut memasukkan elemen pemindahan teknologi dan kepakaran menerusi rundingan yang sedang dibuat bagi tujuan perolehan vaksin daripada negara atau syarikat farmaseutikal luar negara seperti penerokaan kerjasama pembangunan mRNA dengan **University of Chulalongkorn, Thailand** dan pembangunan vaksin leptospirosis dengan **Imperial College London (ICL)**.

9. Selain itu, Institut Genom dan Vaksin Malaysia (MGVI) juga terlibat dalam projek *genome surveillance* virus SARS-CoV-2. Projek ini adalah amat penting dan strategik untuk mengenalpasti dan memantau varian virus penyebab COVID-19 terutamanya:

- *variant of concern* (VOC) seperti varian Alpha, Beta, Gamma, Delta dan Omicron;

- *variant of interest* (VOI) seperti varian Lambda dan Mu; serta
- *variants under monitoring* (VUM).

Pembangunan vaksin dapat dipercepatkan hasil maklumat jujukan genetik (*gene sequence*) COVID-19.

10. Sebagai kesimpulannya, bagi memastikan keperluan negara supaya tidak bergantung sumber vaksin asing dalam melawan pandemik COVID-19, pembangunan vaksin memerlukan komitmen daripada pelbagai pihak termasuk Kerajaan kerana melibatkan tempoh masa yang panjang, fasiliti yang lengkap dan sokongan polisi.

11. Melalui kolaborasi (*whole of nation approach*) kepakaran dari pelbagai pemegang taruh meliputi pihak kerajaan, swasta dan kerjasama luar negara, Malaysia berupaya meningkatkan kapasiti penghasilan vaksin sendiri.

12. Justeru, pelaksanaan Pelan Hala Tuju Pembangunan Vaksin Negara, diyakini dapat menyediakan satu halatuju dan koordinasi yang jelas bagi memacu Malaysia di dalam membangunkan vaksin sendiri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK WIRA HAJI MOHD ANUAR MOHD TAHIR
[TEMERLOH]**

TARIKH : 7 DISEMBER 2021 (SELASA)

SOALAN

DATUK WIRA HAJI MOHD. ANUAR MOHD. TAHIR [TEMERLOH] minta **MENTERI ALAM SEKITAR DAN AIR** menyatakan inisiatif untuk meningkatkan pengedaran air berkualiti disebabkan paip usang malah sungai-sungai sumber bekalan air sering tercemar akibat kelodak dari pembangunan, sisa kimia perindustrian, mendapan dan muka sauk tidak dapat berfungsi dikala kemarau serta Loji Rawatan Air (LRA) tenggelam di musim banjir.

JAWAPAN

Tuan Yang Di-Pertua,

1. Untuk makluman Yang Berhormat, di antara inisiatif untuk meningkatkan pengedaran air berkualiti disebabkan paip usang adalah seperti berikut:

- i. penggantian paip (utama, retikulasi dan penghubung);
- ii. pembaikan kebocoran dan limpahan takungan perkhidmatan;
- iii. pembangunan *Hydraulic Modelling*, Sistem Pemantauan (SCADA/Telemetry) dan *Geographical Information System* (GIS);
- iv. pembentukan *District Metering Zone* (DMZ) dan *Pressure Management Area* (PMA);
- v. pengesanan dan pembaikan kebocoran secara aktif; dan
- vi. pemasangan dan penukaran meter (pengguna/SIV/DMZ).

2. Dalam pada itu, Kerajaan Persekutuan telah meluluskan peruntukan sebanyak RM726 juta bagi membiayai projek bekalan air di negeri Pahang seperti berikut:

- i. Peruntukan RM446 juta bagi pembinaan Loji Rawatan Air Semambu Fasa 3 berkapasiti 145 juta liter sehari (JLH) dan RM173 juta bagi pembinaan Tangki Imbangan untuk menyelesaikan masalah bekalan air di Daerah Kuantan terutamanya di kawasan Perindustrian Gebeng;
- ii. peruntukan sebanyak RM18 juta bagi menaiktaraf LRA Bilut, LRA Semantan dan LRA Sungai Klau di Daerah Raub bagi mengatasi masalah kekeruhan pada musim hujan; dan
- iii. pelaksanaan Program Air Tidak Berhasil (NRW) Kebangsaan Pendekatan 1 dengan peruntukan geran sebanyak RM89 juta melibatkan skop kerja seperti penukaran meter-meter pengguna

dan meter *System Input Volume* (SIV) dan pembaikan tangki perkhidmatan yang rosak.

3. Di bawah Pelan Perniagaan Pengurusan Air Pahang Berhad (PAIP) bagi tempoh operasi keempat (2021-2024), sebanyak RM920 juta telah diluluskan untuk pelaksanaan kerja-kerja kapital di bawah pembiayaan Pengurusan Aset Air Berhad (PAAB) yang merangkumi kerja-kerja pembinaan dan naiktaraf loji, pembinaan dan baikpulih tangki perkhidmatan dan kerja-kerja NRW. Satu projek khusus yang dicadangkan melibatkan pembinaan LRA berkapasiti 20 JLH di Lanchang, Temerloh dengan kos sebanyak RM92.65 juta dan cadangan penggantian paip-paip lama di sekitar Daerah Temerloh dengan kos sebanyak RM13.6 juta.

Tuan Yang Di-Pertua,

4. Tanggungjawab ke atas sumber air dan tanah terletak di bawah bidang kuasa Kerajaan Negeri, selaras dengan Perlembagaan Persekutuan, Jadual Kesembilan, Senarai II – Senarai Negeri. Oleh itu, kawalan sumber air dan langkah-langkah kawalan pembangunan tanah perlu dijalankan oleh Kerajaan Negeri bagi memastikan sumber air terpelihara dan menghalang aliran kelodak dan mendapan yang boleh menjejaskan operasi loji rawatan air.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL KEEMPAT,
PARLIMEN KEEMPAT BELAS,

PERTANYAAN : LISAN

DARIPADA : DR LEE BOON CHYE [GOPENG]

TARIKH : 9 DISEMBER 2021 (KHAMIS)

SOALAN

DR. LEE BOON CHYE [GOPENG] minta **PERDANA MENTERI** menyatakan bilangan rakyat Malaysia yang muflis sejak pandemik COVID-19.

JAWAPAN

YB DATO SERI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)

Tuan Yang di-Pertua,

Sejak bermulanya pandemik COVID-19 di Malaysia, jumlah keseluruhan kes kebangkrapan dari bulan Mac 2020 hingga ke September 2021 ialah sebanyak 11,207 kes. Pecahan mengikut tahun ialah seperti yang berikut:

- a. Mac – Disember 2020 berjumlah 6,344 kes; dan
- b. Januari - Oktober 2021 berjumlah 4,863 kes.

Bagi melihat kesan sebenar COVID-19 ke atas penghutang, ia akan mengambil masa sekurang-kurangnya satu (1) tahun bermula tarikh kemungkiran kontrak (*default payment*) memandangkan pemiutang hanya boleh mempetisyen tindakan kebangkrapan yang diasaskan telah berlaku dalam tempoh enam (6) bulan sebelum mengemukakan petisyen.

Tarikh kemungkiran kontrak berkemungkinan berlaku di dalam situasi berikut:

- a. selepas moratorium diberikan selama enam (6) bulan bermula 1 April 2020 sehingga 30 September 2020 tamat; atau
- b. selepas moratorium secara bersasar selama enam bulan lagi yang berakhir pada Mac 2021 tamat; atau
- c. selepas moratorium tambahan selama enam bulan bermula tarikh permohonan dibuka iaitu pada 7 Julai 2021 tamat.

Oleh yang demikian, Jabatan Insolvensi Malaysia akan meneliti jumlah kes kebangkrapan yang didaftarkan dalam tempoh-tempoh yang dinyatakan tersebut dan akan mengambil tindakan pentadbiran yang sewajarnya. Sekian. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGKAL KEEMPAT,
PARLIMEN KE-14**

PERTANYAAN : LISAN
DARIPADA : TUAN WONG KAH WHO [IPOH TIMUR]
TARIKH : 7 DISEMBER 2021 (SELASA)

SOALAN

TUAN WONG KAH WOH [IPOH TIMUR] minta **KEMENTERIAN PERDAGANGAN ANTARABANGSA DAN INDUSTRI** menyatakan sama ada Kerajaan bercadang untuk membatalkan keperluan kelulusan MITI bagi perniagaan-perniagaan yang dibenarkan beroperasi yang tidak lagi membawa kesan memandangkan kebanyakan negeri telah memasuki PPN Fasa 3.

JAWAPAN

Seperti yang kita sedia maklum, sehingga hari ini hampir kesemua negeri telah memasuki Pelan Pemulihan Negara (PPN) Fasa 4 dan hanya dua negeri sahaja yang berada di PPN Fasa 3 iaitu Kelantan dan Sarawak.

Bagi kedua-dua PPN Fasa 3 dan 4, sektor ekonomi yang dibenarkan beroperasi di bawah Kementerian Perdagangan Dalam Negeri dan Hal Ehwal Pengguna (KDPNHEP), Kementerian Kerja Raya (KKR) dan Kementerian Pelancongan, Seni dan Budaya (MoTAC) tidak lagi memerlukan kebenaran beroperasi melalui COVID-19 *Intelligent Management System* (CIMS) daripada MITI susulan pengumuman yang telah dibuat oleh kementerian-kementerian berkenaan.

Dalam pada itu, bagi sektor pembuatan, pembinaan, perlombongan dan pengkuarian pula, bagi kedua-dua PPN Fasa 3 dan 4, tahap kapasiti operasi yang dibenarkan adalah bergantung kepada kadar vaksinasi lengkap bagi pekerja di bawah dengan pelaksanaan Ujian RTK Antigen

secara wajib ke atas pekerja wajib setiap dua (2) minggu dengan kos ditanggung oleh majikan.

- a. 80% hingga 100% : Dibenarkan beroperasi dengan kapasiti 100% pekerja.
- b. Kurang 80% : Dibenarkan beroperasi dengan kapasiti sehingga 80% pekerja sahaja.

Justeru, kebenaran beroperasi daripada Kementerian Perdagangan Antarabangsa dan Industri (MITI) adalah masih relevan bagi sektor pembuatan sahaja kerana, walaupun sesebuah negeri itu telah berada di Fasa 3 dan 4, hanya syarikat dengan sekurang-kurangnya 80% pekerja yang telah lengkap vaksinasi boleh beroperasi dengan kapasiti 100%. Maklumat berkenaan dengan kadar vaksinasi boleh dikemaskini melalui sistem CIMS dan seterusnya surat kebenaran beroperasi bagi sektor pembuatan boleh dimuat turun dan dicetak.

Perlu ditegaskan bahawa setiap sektor masih tertakluk kepada prosedur operasi standard (SOP) Pelan Pemulihan Negara (PPN) semasa bagi negeri-negeri di Fasa 3 dan 4.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB TUAN CHONG CHIENG JEN (STAMPIN)

TARIKH : 07 DISEMBER 2021 (SELASA)

SOALAN

TUAN CHONG CHIENG JEN [STAMPIN] minta **MENTERI KANAN KERJA RAYA** menyatakan apakah jadual kerja bahagian Projek Pan Borneo Highway yang meliputi jejantas *fly-over* di Batu 6, Batu 7 dan Batu 10 Jalan Penrissen di Kuching. Apakah langkah yang akan diambil untuk mengurangkan kesesakan di bahagian tersebut khususnya pada waktu puncak iaitu 6:30 ke 9:00 pagi dan 5:00 ke 7:30 malam.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kerja Raya mengambil maklum aduan kesesakan jalan raya di Mile 6, Mile 7 dan Mile 10 yang disebabkan oleh penutupan sementara sebahagian jalan bagi tujuan kerja-kerja pembinaan di bawah Projek Lebuhraya Pan Borneo Sarawak.

Bagi mengurangkan kadar kesesakan di lokasi-lokasi tersebut, tindakan-tindakan proaktif seperti berikut telah dilaksanakan oleh Kementerian Kerja Raya melalui JKR Sarawak dan kontraktor yang dilantik:

- i) Menyediakan dua (2) laluan tambahan di Mile 6 untuk laluan Kuching ke Serian dan satu (1) laluan tambahan di Mile 7 berdekatan *Borneo House Museum*;
- ii) Bantuan polis trafik bagi kawalan lalu lintas pada waktu puncak (*peak hours*);
- iii) Mengemaskini Pelan Pengurusan Trafik berdasarkan situasi di tapak; dan
- iv) Memendekkan keseluruhan tempoh kerja-kerja pembinaan di lokasi-lokasi tersebut daripada tiga (3) bulan kepada dua (2) bulan.

Jalan-jalan tersebut akan dibuka semula secara berperingkat di mana kerja-kerja pembinaan telah selesai pada 12 Oktober 2021 bagi Mile 7 dan 21 November 2021 bagi Mile 6 manakala jangkaan 15 Disember 2021 bagi Mile 10. Sehubungan itu, Kementerian Kerja Raya memohon kerjasama dan kesabaran pengguna jalan raya dalam tempoh tersebut untuk mematuhi papan tanda jalan dan had kelajuan di lokasi-lokasi tersebut.

Kerja-kerja pembinaan tersebut adalah sebahagian daripada inisiatif Kerajaan Persekutuan untuk menambahbaik kemudahan infrastruktur jalan raya khususnya bagi pergerakan pengguna jalan raya dari Kuching ke Serian.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : TUAN ANYI NGAU [BARAM]

TARIKH : 11 DISEMBER 2021 (SELASA)

SOALAN

TUAN ANYI NGAU [BARAM] minta **PERDANA MENTERI** menyatakan menyatakan perancangan sosioekonomi di kawasan RECODA amnya dan Kawasan HDA khususnya. Nyatakan tujuan/jumlah peruntukan yang disalurkan kepada RECODA sejak tahun 2018.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang Di-Pertua,

1. Kerajaan melalui Lembaga Pembangunan Koridor Wilayah (RECODA) mempunyai perancangan bagi program sosiokenomi bagi tiga agensi di bawah RECODA iaitu Upper Rajang Development Agency (URDA), Highland Development Agency (HDA) dan Northern Region Development Agency (NRDA) seperti projek akuakultur, agro-makanan, kraftangan, industri logam, pembangunan ladang pertanian dan pembangunan pusat pelancongan luar bandar yang bertujuan untuk menjana pendapatan, meningkatkan kesejahteraan dan taraf hidup masyarakat.
2. Bagi kawasan HDA, program sosioekonomi yang dirancang meliputi pembangunan ladang pertanian seperti kopi, kelapa dan sayuran, pembangunan pusat pelancongan luar bandar seperti naik taraf inap desa, penyediaan sistem tagang iaitu kaedah untuk pengawalan dan pemuliharaan kehidupan akuatik, pusat pengumpulan, pemprosesan dan pembungkusan produk tanaman (CPPC) serta menaiktaraf premis bagi industri logam.
3. RECODA telah menerima peruntukan berjumlah RM37.9 juta bagi belanja mengurus, manakala RM872 juta bagi belanja pembangunan sejak Tahun 2018 sehingga 2021.
4. Walau bagaimanapun, bagi tujuan pembangunan sosioekonomi HDA, belum ada peruntukan disalurkan oleh Kerajaan Persekutuan kepada RECODA. Sebaliknya pelaksanaan program sosioekonomi di HDA ditampung daripada peruntukan yang disalurkan oleh Kerajaan Negeri Sarawak.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS (2021)**

PERTANYAAN : JAWAB LISAN

DARIPADA : TUAN WONG HON WAI [BUKIT BENDERA]

TARIKH : 7 DISEMBER 2021 (SELASA)

SOALAN

TUAN WONG HON WAI [BUKIT BENDERA] minta **MENTERI ALAM SEKITAR DAN AIR** menyatakan usaha pembaharuan undang-undang yang telah atau sedang diusahakan oleh pihak Kementerian Alam Sekitar dan Air sejak Mac 2020 dan bilakah pembaharuan tersebut akan dibentangkan di Parlimen.

JAWAPAN

Tuan Yang Di-Pertua,

1. Kementerian Alam Sekitar dan Air (KASA) sedang mengukuhkan Akta Kualiti Alam Sekeliling 1974 (AKAS 1974) [Akta 127]. Pengukuhan AKAS 1974 akan dibuat secara berfasa yang mana pada fasa pertama, pindaan memfokuskan kepada elemen kompaun, penalti dan standard bagi memastikan tindakan tegas dapat diambil ke atas pelaku dan pesalah yang menyebabkan pencemaran alam sekitar.
2. Untuk makluman, draf Rang Undang-undang Pindaan AKAS 1974 bagi fasa pertama telah dikemukakan untuk semakan dan kelulusan Jabatan Peguam Negara. Setelah diluluskan, KASA akan membentangkan Memorandum Jemaah Menteri mengenai Pindaan AKAS 1974 untuk pertimbangan dan persetujuan Jemaah Menteri. Pindaan AKAS 1974 ini dijangka akan dibentangkan dalam Parlimen pada suku pertama tahun 2022.

Tuan Yang Di-Pertua,

3. KASA juga dalam konteks melaksanakan pembaharuan undang-undang dalam **sektor air** dan akan meminda 2 perundangan utama, iaitu Akta Suruhanjaya Perkhidmatan Air Negara 2006 [Akta 654] dan Akta Industri Perkhidmatan Air 2006 [Akta 655].

4. Pindaan Akta 654 akan membantu memperkasakan sistem tadbir urus dan memperkukuh kecekapan pengurusan Suruhanjaya Perkhidmatan Air Negara (SPAN). Manakala, pindaan ke atas Akta 655 bertujuan untuk mewujudkan ekosistem kawal selia yang mantap bagi menyokong pelaksanaan dasar sedia ada dan dasar baharu. Langkah ini penting bagi memastikan punca kuasa perundangan yang dipertanggungjawabkan sentiasa relevan dalam memenuhi cabaran semasa dan masa hadapan industri perkhidmatan bekalan air dan pembetungan.

5. Pindaan-pindaan penting yang dicadangkan termasuklah ke atas tempoh lantikan anggota SPAN, larangan penggunaan logo SPAN tanpa kebenaran, menggalakkan amalan ekonomi kitaran dalam industri air melalui penerokaan air pulih guna sebagai sumber bekalan air alternatif, pemantapan ekosistem pengurusan sisa rawatan air, meningkatkan kadar hukuman bagi kesalahan pencemaran air yang menjejaskan perkhidmatan bekalan air dan penubuhan Tribunal Industri Perkhidmatan Air.

5. Cadangan pindaan Akta 654 dan 655 telah melalui proses siri rundingan bersama dengan pemegang taruh termasuklah operator air, kementerian/jabatan Kerajaan serta Kerajaan-Kerajaan Negeri. Maklum balas yang diterima telah dijadikan input bagi memantapkan penyediaan draf Rang Undang-Undang Pindaan Akta 654 dan 655. Tertakluk kepada kelancaran proses semakan oleh Jabatan Peguam Negara dan kelulusan oleh Jemaah Menteri, Rang Undang-Undang ini disasarkan untuk dibentangkan di Parlimen pada suku ke-dua tahun 2022.

6. Melihat kepada isu **perubahan iklim** yang sering dibincangkan di peringkat antarabangsa, untuk makluman Ahli Yang Berhormat, bagi

memastikan tadbir urus perubahan iklim sentiasa diberi perhatian yang sewajarnya, KASA kini di dalam fasa awal membangunkan kerangka undang-undang perubahan iklim negara yang dijangka siap pada awal tahun 2022. Kerangka undang-undang tersebut akan menjadi asas kepada pembangunan Akta Perubahan Iklim kelak dan ia dijangka akan dibentangkan di Parlimen pada tahun 2025.

Tuan Yang Di-Pertua,

7. Bidang bioteknologi moden semakin menjadi tumpuan sebagai katalis penting yang memacu perkembangan pelbagai sektor penting terutamanya berkaitan pertanian, pengeluaran makanan, kesihatan, keselamatan dan pertahanan. KASA melalui Jabatan Biokeselamatan menguat kuasa dan mengawal selia pelepasan, pengimportan, pengeksportan dan kegunaan terkawal organisma hidup yang diubah suai (*living modified organism* - LMO) yang terhasil dari aktiviti bioteknologi moden melalui Akta Biokeselamatan 2007 [Akta 678].

8. Untuk makluman, KASA sedang dalam proses menyemak dan meminda Akta 678. Antara perkara utama yang diberi tumpuan dalam pindaan Akta 678 adalah mewujudkan peruntukan khusus mengenai tanggungan dan ganti rugi (*liability and redress*) yang akan memberikan hak kepada pihak yang terkesan untuk membuat tuntutan kepada pihak yang bertanggungjawab. Semakan dan pindaan Akta 678 ini dijangka akan selesai menjelang pertengahan tahun 2023.

9. Selain daripada pembaharuan kepada Akta 678, Kerajaan juga akan memperkenalkan dan menguat kuasa 2 peraturan baharu berkaitan LMO seperti berikut:

- (i) Peraturan Pelabelan LMO dan Produknya; dan
- (ii) Peraturan berkaitan Pengendalian, Pengangkutan, Pembungkusan dan Pengenalpastian LMO.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DATUK DR. HASAN BIN BAHROM [TAMPIN]

TARIKH : 7 DISEMBER 2021 (SELASA)

SOALAN

Minta **PERDANA MENTERI** menyatakan bagaimana Kerajaan memastikan pendapatan masyarakat bandar dan luar bandar seimbang. Apakah polisi yang menjadi keutamaan.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Melalui Bajet 2022 yang telah dibentangkan pada 29 Oktober 2021, Kerajaan akan melaksanakan beberapa inisiatif untuk meningkatkan pendapatan di bandar dan luar bandar. Antara inisiatif tersebut adalah seperti berikut:

- i. Menjamin penyediaan 600 ribu peluang pekerjaan dengan peruntukan berjumlah RM4.8 bilion ringgit di bawah inisiatif Jamin Kerja Keluarga Malaysia (atau JaminKerja);
- ii. Insentif penggajian JaminKerja dengan sasaran 300 ribu orang dengan peruntukan RM2 bilion; dan
- iii. Pembiayaan kredit mikro bernilai hampir RM1.8 bilion akan disediakan melalui pelbagai agensi seperti TEKUN, Agrobank, BSN, Bank Rakyat dan Bank Negara Malaysia untuk membantu peniaga kecil dan sektor informal.

2. Strategi yang akan dilaksana bukan sahaja dalam meningkatkan pendapatan dan taraf hidup isi rumah tetapi termasuk menambah baik akses kepada perkhidmatan penting seperti infrastruktur, memperkukuh mekanisme penyampaian perkhidmatan dan mengurangkan ketidaksamarataan antara isi rumah di bandar dan di luar bandar. Melalui Bajet 2022, Kerajaan akan memperuntukkan lebih daripada RM 2.5 bilion bagi merapatkan jurang antara wilayah, merangkumi projek jalan luar bandar dan perhubungan desa, bekalan air bersih, bekalan elektrik dan lampu jalan kampung.

3. Bagi jangka sederhana dan panjang, Kerajaan akan meneruskan dasar dan strategi untuk meningkatkan pendapatan dan kuasa beli serta kesejahteraan terutamanya isi rumah di bandar dan luar bandar dalam Rancangan Malaysia Kedua Belas (RMKe-12), 2021-2025 termasuk:

- i. menyediakan program peningkatan pendapatan serta peningkatan keupayaan mendapat pekerjaan yang berpendapatan lebih tinggi dengan membina kapasiti dan keupayaan Program Peningkatan Pendapatan melalui Skim Kesejahteraan Rakyat;
- ii. menambahbaik akses kepada keperluan asas termasuk pendidikan, kesihatan dan perumahan. Bagi perumahan, program/projek yang terlibat termasuklah Program Perumahan Rakyat Termiskin, Program Bantuan Rumah dan Projek Perumahan Mampu Milik;
- iii. menggalakkan keusahawanan dan akses kepada pembiayaan kewangan untuk menjana pendapatan dengan melaksanakan program latihan keusahawanan serta menyediakan kemudahan pembiayaan mikro seperti TEKUN; dan
- iv. meningkatkan sistem perlindungan sosial dengan mewujudkan satu rangka kerja sistem perlindungan sosial yang bersepadu dan komprehensif termasuk Skim Peduli Kesihatan untuk Kumpulan B40 (PeKa B40).

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : JAWAB LISAN

DARIPADA : TUAN TAN KOK WAI [CHERAS]

TARIKH : 7 DISEMBER (SELASA)

SOALAN

TUAN TAN KOK WAI [CHERAS] minta **MENTERI LUAR NEGERI** menyatakan cabaran dan ketidaktentuan geopolitik serantau dan di seluruh dunia yang perlu diberikan perhatian oleh negara kita.

JAWAPAN

Tuan Yang di-Pertua,

Saya mengucapkan terima kasih kepada **Yang Berhormat Cheras** atas pertanyaan yang dikemukakan berkenaan cabaran dan ketidaktentuan geopolitik dunia yang perlu diberi perhatian oleh negara kita.

Tuan Yang di-Pertua,

2. Malaysia berada di kedudukan geografi yang strategik iaitu di tengah-tengah rantau Asia Tenggara dan bersempadan dengan laluan perkapalan utama dunia iaitu Selat Melaka dan Laut China Selatan. Adalah penting bagi Malaysia untuk memastikan kedua-dua perairan ini kekal bebas dari dikuasai oleh mana-mana kuasa besar, kerana sebarang konflik yang bersifat ketenteraan di perairan tersebut akan menjejaskan kemakmuran ekonomi di rantau ini khususnya, dan di seluruh dunia amnya. Keperluan

untuk mengekalkan keamanan dan kebebasan perairan-perairan ini adalah suatu cabaran bagi Malaysia dan negara-negara serantau.

3. Malaysia memberi perhatian serius terhadap beberapa krisis politik dalaman yang sedang berlaku di beberapa buah negara ketika ini. Krisis-krisis politik dalaman tersebut boleh menjejaskan peluang dan potensi pelaburan Malaysia di samping menjejaskan hubungan dua hala yang telah dijalin erat sebelum ini.

4. Sebagai sebuah negara anggota Pertubuhan Kerjasama Islam (OIC) dan di atas prinsip kemanusiaan, keadilan dan solidariti Islam, Malaysia terus memberi perhatian berat dan komited terhadap Proses Damai Timur Tengah melibatkan Palestin dan Israel yang telah berlanjutan sekian lama. Malaysia terus menggunakan peluang yang ada di pentas antarabangsa untuk mencapai perdamaian yang berkekalan di rantau itu. Malaysia juga kesal dengan peperangan yang masih berterusan di Yemen. Ia telah mengorbankan banyak nyawa dan harta benda, selain mengakibatkan krisis kemanusiaan yang serius.

5. Di dalam konteks yang lebih luas, Malaysia turut memberi perhatian kepada situasi tidak menentu akibat persaingan kuasa politik dan ekonomi oleh dua kuasa besar dunia iaitu Amerika Syarikat dan China. Sebagai sebuah negara yang berkecuali, Malaysia mengekalkan hubungan yang rapat dengan kedua-dua kuasa besar tersebut di dalam pelbagai bidang. Amerika Syarikat dan China juga merupakan di antara rakan dagang yang terpenting bagi Malaysia. Konflik terbuka di antara mereka perlu dielakkan kerana ia mengancam keamanan dan kestabilan dunia.

Sekian, terima kasih.

**PEMBERITAHUAN PERTANYAAN LISAN DEWAN NEGARA
MESYUARAT KEDUA, PENGGAL KEEMPAT
PARLIMEN KEEMPAT BELAS (2021)**

PERTANYAAN : JAWAB LISAN

**DARIPADA : YB TUAN KHALID BIN ABD SAMAD
(SHAH ALAM)**

TARIKH : 7 DISEMBER 2021 (SELASA)

SOALAN

Minta **PERDANA MENTERI** menyatakan adakah Kerajaan bersetuju untuk melaksanakan sistem e-filing yang kini digunakan secara luas di mahkamah-mahkamah sivil untuk turut digunapakai di mahkamah-mahkamah syariah untuk mempercepatkan proses keadilan di mahkamah syariah.

JAWAPAN

**YB SENATOR TUAN HAJI IDRIS BIN HAJI AHMAD,
MENTERI DI JABATAN PERDANA MENTERI (HAL EHWAL AGAMA)**

Tuan Yang Di Pertua,

1. Selaras dengan kemajuan teknologi maklumat dan Revolusi Industri 4.0 (IR4.0), mahkamah-mahkamah Syariah juga tidak boleh ketinggalan daripada menggunakan teknologi di dalam urusan mereka.
2. Pada 3 Mei 2021, Kerajaan Persekutuan telahpun meluluskan peruntukan sebanyak RM 3.49 juta bagi meneruskan projek transformasi E-Syariah Versi Ke-3 (ESV3). ESV3 meliputi 16 komponen iaitu Pengurusan Kes Mahkamah Syariah termasuklah e-filing, Pendaftaran Peguam Syarie, Pengurusan Dokumen, Key Performance Indicator (KPI), Statistik, *Business Intelligence* (BI), e-Nasihat, Portal e-Syariah, Pengurusan Latihan, e-Aduan, Meja Bantuan ICT, Aplikasi Mobile, Integrasi, Kewangan, Keselamatan dan Migrasi Data.
3. Projek transformasi ESV3 yang dijangka siap pada tahun 2023 ini akan menyokong kepada proses pengurusan dan pendengaran kes secara dalam talian yang akan digunakan oleh 205 buah mahkamah Syariah di seluruh negara.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 7 DISEMBER 2021 (SELASA)

SOALAN

TUAN WILLIAM LEONG JEE KEEN [SELAYANG] minta **PERDANA MENTERI** menyatakan sama ada satu Suruhanjaya Siasatan Diraja (RCI) ke dalam integriti dan kebebasan badan kehakiman akan ditubuhkan dan terma-terma rujukannya.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Pelaksanaan Transformasi Parlimen dan Pentadbiran Kerajaan ini termasuklah mengambil tindakan berdasarkan kepentingan agar kebebasan badan kehakiman, transformasi institusi dan tatakelola kerajaan yang baik dapat diwujudkan bagi memastikan keadaan yang lebih kondusif untuk rakyat dan negara.

Penubuhan Suruhanjaya Siasatan Diraja (RCI) berkaitan integriti dan kebebasan badan kehakiman perlu dikaji dengan teliti berdasarkan keperluan sebelum apa-apa keputusan dasar diambil.

Penubuhan sesuatu Suruhanjaya Siasatan hendaklah dibuat menurut peruntukan di bawah Akta Suruhanjaya Siasatan 1950 [Akta 119]. Seksyen 2 Akta 119 memperuntukkan seperti yang berikut:

“Pengeluaran Tauliah

2. (1) *Yang di-Pertuan Agong boleh, jika didapatinya suai manfaat berbuat demikian, mengeluarkan suatu Tauliah melantik seorang Pesuruhjaya atau lebih dan memberi kuasa Pesuruhjaya itu untuk menyiasat—*

- (a) kelakuan mana-mana pegawai persekutuan;*
- (b) perjalanan atau pengurusan mana-mana jabatan perkhidmatan awam Malaysia;*
- (c) perjalanan atau pengurusan mana-mana institusi awam yang tidak semata-mata disenggarakan dengan kumpulan wang Negeri; atau*

(d) apa-apa perkara lain yang siasatannya, pada pendapat Yang di-Pertuan Agong, berfaedah bagi kebajikan awam, iaitu bukan—

- (i) suatu perkara yang melibatkan apa-apa soal yang berhubungan dengan agama Islam atau adat Melayu; atau
- (ii) berhubung dengan Sabah atau Sarawak, suatu perkara yang dinyatakan dalam butiran 10 Senarai Negeri:

Dengan syarat bahawa jika mana-mana pegawai persekutuan yang kelakuannya dicadangkan untuk disiasat itu, telah pada masa melakukan kelakuan itu, berkhidmat dalam suatu jabatan perkhidmatan awam sesuatu Negeri, tauliah itu hendaklah dikeluarkan hanya dengan persetujuan Pihak Berkuasa Negeri itu.

(2) (Dipotong oleh L.N. 332/1958).

(3) Pihak Berkuasa Negeri mana-mana Negeri selain Sabah atau Sarawak boleh, jika didapatinya suai manfaat berbuat demikian, mengeluarkan suatu Tauliah melantik seorang Pesuruhjaya atau lebih dan memberi kuasa kepada Pesuruhjaya itu menyiasat—

- (a) kelakuan mana-mana pegawai Negeri;
- (b) penjalanan atau pengurusan mana-mana jabatan perkhidmatan awam Negeri itu;
- (c) penjalanan atau pengurusan mana-mana institusi awam yang disenggarakan semata-mata dengan kumpulan wang Negeri; atau
- (d) apa-apa perkara lain yang siasatan, pada pendapat Pihak Berkuasa Negeri itu, berfaedah bagi kebajikan awam Negeri itu dan yang tidak secara langsung melibatkan kebajikan awam mana-mana Negeri lain:

Dengan syarat bahawa jika mana-mana pegawai Negeri, yang kelakuannya dicadangkan untuk disiasat itu, telah, pada masa melakukan kelakuan itu berkhidmat dalam suatu jabatan Kerajaan Persekutuan atau jabatan perkhidmatan awam suatu Negeri lain, Tauliah itu hendaklah dikeluarkan hanya dengan persetujuan Yang di-Pertuan Agong atau Pihak Berkuasa Negeri yang lain itu, mengikut mana-mana yang berkenaan.

(4) Dalam seksyen ini, melainkan jika konteksnya menghendaki makna yang lain—

- (a) “pegawai persekutuan” ertinya mana-mana pegawai yang dilantik dan diambil bekerja oleh Kerajaan Persekutuan, dan mana-mana pegawai yang syarat pekerjaannya menjadikan dia bertanggung berkhidmat dengan lebih daripada satu Negeri;*
- (b) “pegawai Negeri” ertinya mana-mana pegawai yang dilantik oleh Kerajaan Negeri, selain Kerajaan Negeri Sabah atau Sarawak, yang syarat pekerjaannya tidak menjadikan dia bertanggung berkhidmat di luar Negeri itu;*
- (c) (Dipotong oleh L.N. 332/1958).”.*

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL KEEMPAT
PARLIMEN KEEMPAT BELAS

PERTANYAAN : LISAN

**DARIPADA : YB DATO' HAJI MAHFUZ BIN
HAJI OMAR [POKOK SENA]**

TARIKH : 7 DISEMBER 2021 (SELASA)

SOALAN

Minta **PERDANA MENTERI** menyatakan apakah asas kes kematian arwah Adib ditutup seperti yang dinyatakan oleh YB Datuk Zuraida Kamarudin, Menteri Perusahaan Perladangan dan Komoditi dalam kenyataannya pada media bertarikh 25 September 2021.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang Di-Pertua,

Untuk makluman Ahli Yang Berhormat, siasatan berhubung kematian Muhammad Adib bin Mohd Kassim diteruskan oleh pihak Polis Diraja Malaysia lanjutan daripada keputusan Koroner dalam prosiding inkues yang telah dijalankan. Walau bagaimanapun, sehingga kini pelaku yang menyebabkan kematian Muhammad Adib masih belum dapat dikenal pasti. Bahkan, inkues yang dijalankan juga tidak dapat mengenal pasti pelaku yang menyebabkan kematiannya. Justeru, tiada sebarang pendakwaan yang diputuskan setakat ini.

Kerajaan tidak mengambil sikap berputus asa dan masih berusaha untuk mengenal pasti pelaku yang menyebabkan kematian Almarhum Muhammad Adib. Untuk tujuan itu, semasa mesyuarat Jemaah Menteri bertarikh 8 Oktober 2021, dipersetujui oleh Jemaah Menteri bahawa satu Jawatankuasa Khas hendaklah ditubuhkan bagi membantu pihak polis dalam mengenal pasti pelaku yang menyebabkan kematian anggota bomba itu.

YAB Perdana Menteri menyatakan bahawa jawatankuasa itu akan dipengerusikan oleh Menteri di Jabatan Perdana Menteri (Parlimen dan Undang-Undang), YB Dato' Sri Dr. Haji Wan Junaidi bin Tuanku Jaafar dan turut dianggotai oleh Menteri Dalam Negeri, YB Dato' Sri Hamzah bin Zainuddin, Menteri Perumahan dan Kerajaan Tempatan (KPKT), YB Dato' Sri Reezal Merican bin Naina Merican serta Peguam Negara, YBhg. Tan Sri Idrus bin Harun.

Jawatankuasa itu akan mengemukakan dapatan dan syor kepada mesyuarat Jemaah Menteri dalam tempoh enam bulan sebagaimana keputusan Jemaah Menteri pada 29 Oktober 2021. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN WONG CHEN [SUBANG]

TARIKH : 7 DISEMBER 2021 (SELASA)

SOALAN :

TUAN WONG CHEN [SUBANG] minta **PERDANA MENTERI** menyatakan apakah kemajuan terkini mengenai Pelan Tindakan Nasional Mengenai Perniagaan Dan Hak Asasi Manusia (NAPBHR) yang akan dilancarkan pada tahun 2023?

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, satu mesyuarat Jawatankuasa Pemandu Pembangunan Pelan Tindakan Nasional Mengenai Perniagaan dan Hak Asasi Manusia (NAPBHR) yang dipengerusikan oleh YB Menteri di Jabatan Perdana Menteri (Parlimen dan Undang-Undang) telah diadakan pada 6 Julai 2021. Isu – isu yang telah dikenalpasti semasa siri libat urus bersama pihak berkepentingan seperti Agensi Kerajaan, SUHAKAM, pihak swasta dan Badan Bukan Kerajaan telah dibentangkan dalam mesyuarat tersebut dan jawatankuasa tersebut telah bersetuju untuk menubuhkan tiga (3) Jawatankuasa Teknikal berdasarkan tematik isu Buruh, Alam Sekitar dan Tadbir Urus. Setiap tema ini akan diterajui oleh beberapa kementerian/agensi yang berkaitan yang telah dikenal pasti.

Kerajaan sedang dalam proses mengenal pasti dan melantik ahli-ahli bagi ketiga-tiga Jawatankuasa Teknikal tersebut yang akan terdiri daripada wakil-wakil agensi-agensi yang berkaitan dengan *thematic areas* tersebut serta NGO dan CSO yang berkaitan.

Mesyuarat Jawatankuasa Pemandu yang dipengerusikan oleh YB Menteri di Jabatan Perdana Menteri (Parlimen & Undang-Undang) akan diadakan pada bulan Disember 2021 ini. Tujuan mesyuarat ini adalah untuk mengambil maklum perkara-perkara yang telah dilaksanakan oleh Jawatankuasa Teknikal dan saranan-saranan dari pihak berkepentingan yang terlibat. Selain itu, kerajaan juga akan melaksanakan *National Baseline Assessment* (NBA) bagi NAPBHR dan proses pelaksanaan NBA ini akan bermula pada penghujung tahun 2021 atau permulaan tahun 2022.

Sekian, terima kasih.

**PEMBERITAHUAN PERTANYAAN DEWAN RAKYAT MESYUARAT
KEDUA, PENGGAL KEEMPAT
PARLIMEN KE EMPAT BELAS (2021)**

PERTANYAAN : LISAN

DARIPADA : TUAN CHOW KON YEOW [TANJONG]

TARIKH : 7 DISEMBER 2021 [SELASA]

SOALAN

TUAN CHOW KON YEOW [TANJONG] minta **MENTERI ALAM SEKITAR DAN AIR** menyatakan tindakan dan perancangan Kerajaan bagi memelihara kawasan tadahan air Ulu Muda. Adakah Lembaga Lembangan Ulu Muda (UMBA) sebagaimana dicadangkan Perbadanan Bekalan Air Pulau Pinang (PBAPP) sebelum ini diluluskan. Jika ya, bila ia akan dilaksanakan dan sekiranya tidak, nyatakan sebabnya. Apakah pendirian Kerajaan Pusat berhubung pengumuman terkini Kerajaan Negeri Kedah yang meluluskan kawasan pembalakan membabitkan 25,000 hektar di Hutan Ulu Muda daripada jumlah keluasan 75,000 hektar.

JAWAPAN

Tuan Yang Di-Pertua,

1. Untuk makluman Ahli Yang Berhormat, cadangan penubuhan Lembaga Lembangan Ulu Muda (*Ulu Muda Basin Authority* – UMBA) sebagai sebuah badan berkanun bebas di bawah Kementerian ini yang bertanggungjawab ke atas sumber air bagi tiga Wilayah Ekonomi Koridor Utara (NCER) iaitu Perlis, Kedah dan Pulau Pinang adalah bertentangan dengan peruntukan di dalam Perlembagaan Persekutuan.
2. Seperti Ahli Yang Berhormat sedia maklum, perkara berkaitan dengan sumber air dan tanah adalah terletak di bawah bidang kuasa kerajaan negeri, selaras dengan Perlembagaan Persekutuan, Jadual Kesembilan, Senarai II –

Senarai Negeri. Justeru, melalui cadangan ini Kerajaan Persekutuan dilihat akan melangkaui (*encroaches*) kuasa perundangan kerajaan negeri.

3. Kementerian ini maklum bahawa, berdasarkan Perkara 11 (b), Senarai 1, Perlembagaan Persekutuan, Kerajaan Persekutuan mempunyai kuasa perundangan terhadap *interstate river*. Walau bagaimanapun, melalui peruntukan ini, Kerajaan Persekutuan hanya mempunyai kuasa ke atas sungai yang merentasi sempadan negeri itu sahaja.

4. Cadangan penubuhan UMBA yang dikemukakan oleh Perbadanan Bekalan Air Pulau Pinang (PBAPP) turut mencadangkan pematuhan “Rancangan Lembangan Ulu Muda” yang melibatkan tanah, sumber air dan hutan yang merupakan bidang kuasa perundangan dan eksekutif kerajaan negeri. Dalam hal ini, Kementerian telah membuat semakan terhadap Enakmen Sumber Air Kedah, 2008 dan ia jelas menyatakan bahawa kawasan lembangan sungai adalah termasuk tanah yang berada di sekitar sungai. Enakmen tersebut juga telah memperuntukkan perkara berkaitan penyediaan rancangan lembangan sungai di negeri itu.

5. Walau bagaimanapun, bagi memelihara kawasan tadahan air Ulu Muda, Kementerian telah melaksanakan pendekatan Pengurusan Lembangan Sungai Bersepadu (*Intergated River Basin Management-IRBM*) di Lembangan Sungai Muda pada tahun 2018. Pelan IRBM ini perlu dijadikan asas oleh Kerajaan Negeri bagi pembangunan guna tanah di Lembangan Sungai Muda untuk mengelakkan berlakunya insiden pencemaran dan memastikan sumber air yang bersih serta mencukupi.

6. Sehubungan dengan itu, adalah wajar kedua-dua negeri iaitu Kerajaan Negeri Pulau Pinang dan Kerajaan Negeri Kedah mengadakan perbincangan bagi mengenal pasti kaedah yang terbaik serta tindakan bersepadu dalam menyelesaikan isu yang telah lama berlanjutan ini. Kementerian ini bersedia untuk menjadi pemudahcara (*moderator*) bagi rundingan di antara kedua-dua Kerajaan Negeri agar kelestarian sumber air dan alam sekitar di Lembangan Sungai Muda terpelihara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' ABDULLAH SANI BIN ABDUL HAMID
[KAPAR]**

TARIKH : 07 DISEMBER 2021 (SELASA)

SOALAN

Minta **PERDANA MENTERI** menyatakan terdapat perancangan untuk menyalurkan peruntukan khas kepada Anggota Dewan Rakyat menjalankan kajian polisi dan dasar kerana tanggungjawab dan mereka ini adalah membuat dasar dan polisi.

JAWAPAN

**DI JAWAB OLEH YB DATUK DR. ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

Buat masa ini, tiada perancangan untuk menyalurkan peruntukan kepada Ahli Dewan Rakyat bagi menjalankan kajian polisi dan dasar. Hal yang demikian adalah kerana setiap Kementerian telah mempunyai cawangan/bahagian dasar di setiap negeri yang mana bertanggungjawab bagi merangka dan melaksanakan dasar dan polisi Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' WIRA HAJI AMIRUDDIN BIN
HAJI HAMZAH [KUBANG PASU]**

TARIKH : 07 DISEMBER 2021 (SELASA)

SOALAN

Minta **PERDANA MENTERI** menyatakan:

- a. Berapa banyak penerima Bantuan Khas Pengurusan Kematian COVID-19 NADMA telah dikeluarkan dan sama ada ingin dipertimbangkan bantuan ini diberi terus kepada waris tanpa perlu memohon; dan
- b. Sama ada ingin pertimbangkan bantuan yang sama kepada waris mereka yang meninggal akibat "*long-term effects of coronavirus @ Long Covid-19*".

JAWAPAN

**DI JAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

- a. Sehingga 6 Disember 2021, seramai 11,816 orang waris telah menerima Bantuan Khas Pengurusan Kematian COVID-19 yang berjumlah RM59.08 juta. Bantuan ini perlu melalui permohonan bagi memastikan hanya kematian yang disebabkan COVID-19 dan warganegara Malaysia sahaja layak menerima bantuan. Selain itu nombor akaun waris diperlukan kerana bantuan akan disalurkan terus ke akaun waris.
- b. Bantuan Khas Pengurusan Kematian COVID-19 ini hanya meliputi kes kematian *with and due to* COVID-19 yang dikeluarkan oleh Kementerian Kesihatan Malaysia, tidak mengambil kira sama ada kematian disebabkan *short-term* atau long *term effects* COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 7 DISEMBER 2021 (SELASA)

SOALAN

Minta **PERDANA MENTERI** menyatakan bilakah Kerajaan akan meningkatkan jumlah bilangan kerusi Parlimen dari Sabah dan Sarawak kepada 1/3 kerusi daripada 222 kerusi Parlimen ketika ini.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Perubahan kepada jumlah bilangan kerusi Parlimen bagi Negeri Sarawak dan Negeri Sabah sekiranya perlu hanya akan ditentukan semasa urusan kajian semula persempadanan berdasarkan Fasal (2) Perkara 113 Perlembagaan Persekutuan. Bagi maksud tersebut, tempoh 8 tahun bagi kajian semula persempadanan Negeri Sarawak akan berakhir pada tahun 2023 manakala bagi Negeri Sabah pada tahun 2025.

2. Justeru, apa jua tindakan yang akan diambil oleh pihak Kerajaan, khususnya melibatkan pindaan Perlembagaan Persekutuan perlulah melalui kajian yang mendalam. Pandangan serta maklumbalas daripada semua pihak juga mestilah diperhalusi khususnya permohonan daripada Kerajaan Negeri Sabah dan Sarawak. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DATUK ROZMAN BIN ISLI [LABUAN]

TARIKH : 7 DISEMBER 2021 (SELASA)

SOALAN

Minta **PERDANA MENTERI** menyatakan adakah Kerajaan akan menyemak semula Pendapatan Garis Kemiskinan (PGK) bagi menggambarkan keadaan kemiskinan sebenar pasca pandemik COVID - 19.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Kerajaan akan mengemas kini klasifikasi pendapatan dan PGK pada tahun 2022 serentak dengan Survei Pendapatan, Perbelanjaan Isi Rumah dan Kemudahan Asas (HIES & BA) 2022. Untuk makluman Ahli Yang Berhormat, HIES & BA dijalankan dua kali dalam tempoh setiap lima tahun.

2. PGK adalah merujuk kepada jumlah pendapatan bulanan isi rumah yang diperlukan untuk memenuhi keperluan minimum makanan dan bukan makanan bagi membolehkan setiap ahli isi rumah menjalani kehidupan yang sihat dan aktif. PGK yang terkini dikemas kini iaitu pada tahun 2019 menggunakan metodologi PGK 2019 dengan mengambilkira konsep kos keperluan asas dalam pemilihan barangan makanan dan bukan makanan.

3. Pengukuran PGK makanan adalah berdasarkan konsep optimum minimum manakala PGK bukan makanan berdasarkan 146 barangan dan perkhidmatan asas. PGK mengambilkira peningkatan kualiti hidup dan corak perbelanjaan oleh kumpulan isi rumah berpendapatan 20 peratus terendah (B20). PGK 2019 juga menunjukkan perubahan harga semasa bagi barangan dan perkhidmatan.

4. Untuk melengkapi PGK, Kerajaan telahpun menggunakan Indeks Kemiskinan Pelbagai Dimensi (MPI) bagi mengukur kemiskinan dari pelbagai dimensi. Pada masa ini, MPI merangkumi 4 dimensi iaitu kewangan, pendidikan, kesihatan dan taraf hidup yang merangkumi 11 indikator. Dimensi dan indikator ini akan diperluas agar lebih komprehensif untuk mengukur kemiskinan pelbagai dimensi dengan lebih baik termasuk untuk mengambil kira ketersediaan jalur lebar dan peranti digital. Kaedah mengukur kemiskinan akan terus ditambah baik dalam memastikan keberkesanan inisiatif pembasmian kemiskinan dalam RMKe-12 selaras dengan konsepnya Keluarga Malaysia - Makmur, Inklusif, Mampan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK SERI DR. MUJAHID BIN YUSOF
RAWA [PARIT BUNTAR]**

TARIKH : 7 DISEMBER 2021 (SELASA)

SOALAN

DATUK SERI DR. MUJAHID BIN YUSOF RAWA [PARIT BUNTAR] minta **MENTERI LUAR NEGERI** menyatakan sikap Malaysia terhadap penubuhan AUKUS dan kesannya terhadap rantau di sebelah sini.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Parit Buntar atas pertanyaan yang dikemukakan berhubung kerjasama keselamatan tiga hala antara Australia, United Kingdom dan Amerika Syarikat, yang dikenali sebagai AUKUS.

2. Kerajaan sentiasa peka terhadap isu-isu yang melibatkan keselamatan, keamanan dan kestabilan rantau ini. Pendirian Kerajaan mengenai penubuhan AUKUS adalah jelas dan konsisten sehingga kini, berdasarkan kenyataan media oleh YAB Perdana Menteri pada 18 September 2021 berhubung isu ini.

3. Selain bimbang AUKUS boleh memangkin persaingan kuasa dan senjata di rantau ini, Kerajaan juga gusar sekiranya penubuhan AUKUS memprovokasi kuasa-kuasa besar yang lain untuk bertindak lebih agresif, terutamanya di Laut Cina Selatan. Sekiranya ini berlaku, negara-negara

di rantau ini, termasuk Malaysia, akan berada dalam situasi yang rumit, dan usaha mengekalkan Laut China Selatan sebagai laluan perdagangan dan perairan yang aman akan menjadi sukar.

4. Justeru itu, Kerajaan sentiasa menyeru semua pihak di peringkat dua hala, serantau dan pelbagai hala untuk bekerjasama dalam mempertahankan Asia Tenggara sebagai rantau yang aman, stabil serta berkembang dan makmur. Ini selaras dengan prinsip yang digariskan di bawah *ASEAN Outlook on the Indo-Pacific*, Zon Aman, Bebas dan Berkecuali (ZOPFAN), Perjanjian Zon Bebas Senjata Nuklear Asia Tenggara (SEANWFZ) dan Triti Persahabatan dan Kerjasama di Asia Tenggara (TAC). Dokumen-dokumen ini menggariskan tatacara menjalinkan hubungan di rantau Asia Tenggara dalam usaha untuk memastikan rantau ini kekal berkecuali, selamat, stabil dan aman.

5. Negara-negara luar juga perlu menghormati dan mematuhi pendirian dan pendekatan sedia ada Malaysia berhubung operasi kapal selam berkuasa nuklear dalam perairan negara kita. Ini termasuk peraturan-peraturan di bawah Konvensyen Pertubuhan Bangsa-Bangsa Bersatu berkaitan Undang-Undang Laut 1982 (UNCLOS), ZOPFAN, SEANWFZ dan TAC.

6. Dalam hal yang melibatkan isu kedaulatan negara serta keselamatan dan keamanan di rantau ASEAN, termasuk di kawasan perairan negara, Kerajaan tidak akan berkompromi dan akan terus komited untuk memastikan ianya sentiasa dilindungi.

7. Malaysia terus menyeru semua pihak untuk mengelakkan tindakan yang boleh menimbulkan ketegangan dan bersifat provokatif, mengamalkan dengan izin, *self-restraint*, dan mengelakkan tindakan berkaitan ketenteraan, atau dengan izin, *militarisation*. Pendirian ini juga telah disuarakan dengan konsisten di platform-platform serantau dan antarabangsa.

8. Saya telah mengulangi pendirian Malaysia berhubung AUKUS seperti yang dinyatakan tadi melalui beberapa sesi perbincangan dengan negara-negara AUKUS, termasuk semasa sesi sidang video antara saya

dengan Ketua-Ketua Perwakilan tiga negara tersebut pada 22 September 2021 dan sesi perbincangan dengan Vice Admiral David Johnston, Utusan Khas Australia berhubung AUKUS pada 5 Oktober 2021.

9. Di peringkat ASEAN, termasuk dalam penglibatan dengan Rakan-rakan Dialog ASEAN, Kerajaan akan terus mendokong prinsip Kepaksian ASEAN atau '*ASEAN Centrality*' dan mengetengahkan pandangan dan pendirian berprinsip Malaysia, terutamanya dalam usaha Malaysia menangani perkembangan isu politik-keselamatan semasa, termasuklah yang berkaitan dengan kerjasama AUKUS.

Tuan Yang di-Pertua,

10. Malaysia sentiasa memegang kukuh dasar luar negeri yang bebas, berprinsip dan pragmatik serta bertunjangkan nilai-nilai keamanan, kemanusiaan, keadilan dan kesaksamaan.

11. Selain itu, dasar luar negeri Malaysia turut menjunjung prinsip-prinsip berkecuali, menghormati kemerdekaan, kedaulatan, keutuhan wilayah serta sikap tidak campur tangan di dalam urusan domestik negara lain. Pematuhan ke atas prinsip-prinsip ini adalah sangat penting bagi membolehkan Malaysia dilihat sebagai sebuah negara yang mempunyai kredibiliti dan boleh dipercayai di mana imej sedemikian adalah penting bagi melindungi dan mempromosi kepentingan negara.

12. Seperti mana Yang Berhormat sedia maklum, ini bukanlah kali pertama negara perlu mengharungi pertembungan antara kuasa-kuasa besar. Sepanjang tempoh Perang Dingin atau dengan izin "*Cold War*", Malaysia telah berjaya mengekalkan statusnya sebagai sebuah negara yang berkecuali di kala berlakunya pertembungan di antara Blok Barat yang diketuai Amerika Syarikat dan Blok Timur yang diketuai Kesatuan Soviet. Begitu juga tatkala persaingan antara Amerika Syarikat dan China berlaku, Malaysia kekal dengan pendirian tidak berpihaknya dan menjadikan kepentingan negara sebagai tunjang utama di dalam mengendalikan dasar luarnya, selaras dengan prinsip asas Pergerakan Negara-Negara Berkecuali, atau *Non-Aligned Movement* (NAM) yang Malaysia telah anggotai sejak 1970. Pendekatan ini diyakini akan terus

relevan diguna pakai sebagai kerangka keselamatan di rantau Asia Tenggara dan juga di peringkat global.

13. Justeru, saya ingin menyatakan komitmen Kerajaan untuk terus mengekalkan dasar dan kedudukan Malaysia sebagai sebuah negara berkecuali yang tidak akan menyebelahi mana-mana kuasa besar, seperti mana yang telah diamal dan dipraktikkan selama ini.

14. Dalam masa yang sama, adalah menjadi prinsip Kerajaan Malaysia untuk sentiasa mengekalkan hubungan dua hala yang baik dengan semua negara tanpa mengambil kira ideologi atau sistem pentadbiran mereka. Kuasa-kuasa besar dunia, khususnya Amerika Syarikat dan China, adalah rakan kongsi penting Malaysia, bukan sahaja dari segi ekonomi, tetapi juga dalam pelbagai bidang kerjasama lain termasuk pendidikan, pelancongan dan keselamatan. Oleh itu, pendirian dan pendekatan Malaysia untuk mengekalkan hubungan yang erat dengan kedua-dua negara merupakan suatu yang realistik dan pragmatik serta berteraskan prinsip-prinsip dasar luar kita selama ini.

15. Malaysia sentiasa mengambil inisiatif untuk mengimbangkan hubungannya dengan kuasa-kuasa besar melalui dialog bagi membincang serta menyelesaikan isu-isu berkepentingan bersama. Kementerian Luar Negeri akan memastikan bahawa komunikasi dengan kuasa-kuasa besar ini akan sentiasa terbuka dan berterusan. Kerajaan juga akan terus memastikan bahawa hak-hak negara berlandaskan undang-undang negara dan antarabangsa dihormati, dan Kerajaan Malaysia berupaya melindungi kepentingan negara tanpa melibatkan campur tangan kuasa asing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB TUAN BARU BIAN [SELANGAU]

TARIKH : 07 DISEMBER 2021 (SELASA)

SOALAN

Minta **PERDANA MENTERI** menyatakan bolehkan Perdana Menteri mempraktikan slogan "Keluarga Malaysia" kerana terlalu banyak agenda Ketuanan Melayu dan agenda institusi Bumiputera yang akan diteruskan dalam Rancangan Malaysia Ke-12, kerana kebanyakan bukan Bumiputera tidak merasai keikhlasan YAB Perdana Menteri mengenai slogan tersebut.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Konsep dan falsafah Keluarga Malaysia yang diperkenalkan oleh YAB Perdana Menteri Malaysia Ke-9 dalam ucapan sulung beliau pada 22 Ogos 2021 adalah untuk menjamin keutuhan negara melalui penerapan nilai-nilai didikan sempurna dalam sesebuah keluarga.
2. Slogan Keluarga Malaysia bermatlamat untuk memenuhi aspirasi Keluarga Malaysia bagi memastikan 3 nilai utama iaitu:
 - a) Inklusiviti;

- b) Kebersamaan; dan
- c) Kesyukuran.

Tiga nilai ini menjadi asas utama dalam setiap perancangan dan pelaksanaan program/projek oleh setiap Kementerian/Jabatan dan Agensi.

3. Nilai-nilai utama dalam konsep Keluarga Malaysia ini turut menjadi teras menjayakan perancangan Rancangan Malaysia Ke-12 (RMKe-12) kali ini yang bertemakan “Keluarga Malaysia – Makmur, Inklusif dan Mampan”. Pelan strategik lima tahun yang dirangka ini mengambilkira kepentingan semua lapisan bangsa, umur dan kaum.

4. Disamping memperkasakan agenda Bumiputera, RMKe-12 dirangka tanpa meminggirkan sama sekali kepentingan kaum-kaum lain. Sebagai sebuah Keluarga Malaysia, Kerajaan merancang dan melaksanakan pelbagai program/projek bagi memastikan mereka yang masih memerlukan perhatian diberi bantuan yang sewajarnya.

5. Justeru, Keluarga Malaysia disifatkan lebih inklusif kerana konsep ini merentasi sempadan agama, bangsa dan kaum serta mengetepikan apa jua perbezaan dalam setiap perancangan pembangunan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : PUAN ALICE LAU KIONG YIENG [LANANG]

TARIKH : 7 DISEMBER 2021 (SELASA)

SOALAN

PUAN ALICE LAU KIONG YIENG [LANANG] minta **PERDANA MENTERI** menyatakan apakah penambahbaikan Pengundian Awal dan Pengundian Pos Dalam Negara dan Luar Negara yang akan dilaksanakan jika Undi-18 dan pendaftaran pengundi secara automatik berjaya dilaksanakan sebelum Pilihan Raya Negeri Sarawak ke -12 dan Pilihan Raya Umum ke-15.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Suruhanjaya Pilihan Raya (SPR) sentiasa bersedia bagi menghadapi kemungkinan berlakunya pilihan raya sama Pilihan Raya Umum (PRU) Ke-15 atau Pilihan Raya Kecil (PRK). Persediaan ini turut mengambil kira keperluan pertambahan bilangan pemilih dengan mengambil kira pendaftaran Undi 18 secara automatik yang dijangka meningkat sebanyak 500 ribu pemilih setahun. Ini adalah penting bagi memastikan pengendalian penjalanan pilihan raya tersebut berjalan dengan lancar dan sempurna.

Bagi urusan undi pos, SPR akan melaksanakan beberapa pembaharuan bertujuan memberikan kemudahan kepada pemilih berbanding dengan pelaksanaan pilihan raya sebelum ini. Permohonan undi pos untuk Kategori 1B (Luar Negara) dan Kategori 1C (9 Agensi) akan dilaksanakan secara atas talian (*online*) berbanding secara manual sebelum ini. Pemohon perlulah mendaftarkan akaun di MySPR Daftar terlebih dahulu sebelum memohon sebagai pengundi pos.

Selain itu, syarat-syarat kelayakan pengundi pos Kategori 1B (Luar Negara) seperti yang dilaksanakan sebelum ini **telah dimansuhkan** iaitu:

- (i) Bermastautin di luar negara kecuali di Wilayah Selatan Thailand (Narathiwat, Pattani, Yala, Songkhla dan Satun), Singapura, Brunei dan Kalimantan, Indonesia; dan
- (ii) Pernah berada di Malaysia atau kembali ke Malaysia tidak kurang daripada 30 hari dalam tempoh 5 tahun sebelum tarikh pembubaran Dewan Undangan Negeri yang sedang berkuat kuasa.

Dengan pemansuhan syarat-syarat ini, ia akan memberi kemudahan kepada pemilih berdaftar bagi Kategori 1B (Luar Negara) yang berada di luar negara bagi Bahagian Pilihan Raya yang terlibat adalah layak untuk memohon undi pos.

Manakala bagi urusan Undi Awal, SPR akan mengenal pasti dan mewujudkan lebih banyak pusat mengundi awal bagi daerah mengundi yang mempunyai bilangan pemilih undi awal tinggi bagi menampung pertambahan bilangan pemilih dengan pelaksanaan Undi 18 secara automatik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. HAJI DZULKEFLY BIN
AHMAD [KUALA SELANGOR]**

TARIKH : 7 DISEMBER 2021 (SELASA)

SOALAN

**DATUK SERI DR. HAJI DZULKEFLY BIN AHMAD [KUALA
SELANGOR]** minta **PERDANA MENTERI** menyatakan persediaan
negara untuk mengadakan Pilihan Raya Umum atau pun Pilhan Raya
Kecil.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Suruhanjaya Pilihan Raya (SPR) sentiasa bersedia bagi menghadapi kemungkinan berlakunya Pilihan Raya Umum (PRU) Ke-15. Ini adalah penting bagi memastikan pengendalian penjalanan pilihan raya tersebut berjalan dengan lancar dan sempurna terutamanya dalam tempoh pasca COVID-19.

SPR telah membuat persediaan dan perancangan yang menyeluruh meliputi aspek seperti keperluan bajet pilihan raya, peralatan, logistik, pembangunan sistem, pengurusan sumber manusia, latihan kepada petugas, Garis Panduan COVID-19 bagi Pelaksanaan Pilihan Raya dan juga aspek-aspek lain yang berkaitan. Persediaan ini turut mengambil kira keperluan pertambahan bilangan pemilih dengan mengambilkira pelaksanaan Undi 18 secara automatik yang dijangka meningkat sebanyak 500 ribu setahun.

SPR juga akan mewujudkan lebih banyak pusat mengundi tambahan ke atas daerah mengundi yang mempunyai bilangan pemilih yang tinggi. Urusan Pengemaskinian Daerah Mengundi ini akan dilaksanakan oleh SPR dari semasa ke semasa selaras dengan Seksyen 7 (2) Akta Pilihan Raya 1958. SPR akan memastikan pewujudan pusat-pusat mengundi baharu ini akan memudahkan pemilih untuk keluar mengundi pada masa hadapan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN R. SIVARASA [SUNGAI BULOH]

TARIKH : 07 DISEMBER 2021 (SELASA)

SOALAN:

Minta **MENTERI KESIHATAN** menyatakan kenapa dalam keadaan di mana jumlah kes-kes COVID-19 telah mencecah 2.29 juta dan pada kemuncaknya di bulan Ogos dan September 2021 telah sampai ke 20 sehingga 25 ribu kes baru sehari, Kerajaan hanya mengerahkan lebih kurang 5000 kakitangan dengan majoriti besar daripada Kementerian Kesihatan untuk kerja *contact tracing*, dan isolasi dan tidak membuat mobilisasi '*all of government*' untuk langkah *fundamental* ini dan kegagalan ini tentu telah mengakibatkan penyerebakan kes-kes COVID-19.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

1. Kerajaan mengamalkan pendekatan *whole of government, whole of society* (dengan izin) dalam usaha untuk membendung penularan COVID-19. Dalam urusan pengesanan kontak (*contact tracing*) bagi mengenal pasti individu yang menjadi kontak rapat kepada kes positif COVID-19, skop tugas ini dilaksanakan oleh petugas kesihatan dan dibantu oleh petugas bukan kesihatan.
2. Petugas kesihatan terutamanya Pegawai Kesihatan Persekitaran dan Penolong Pegawai Kesihatan Persekitaran adalah terlatih untuk menjalankan pengesanan kontak yang mana pegawai yang terlibat perlu mempunyai pengetahuan dan kefahaman mengenai cara transmisi penyakit berjangkit dan tanda-tanda jangkitan sesuatu penyakit. Selain itu, mereka perlu membuat penilaian dan keputusan sama ada individu yang dikenal pasti sebagai kontak rapat perlu disaring dan diambil sampel klinikal. Pegawai juga boleh menentukan keperluan untuk mengeluarkan arahan kuarantin dan memberi khidmat nasihat kepada individu yang dikenal pasti sebagai kontak rapat.
3. Bagi memenuhi skop kerja kesihatan awam dan juga skop perawatan kesihatan, hingga kini Kerajaan telah melantik secara kontrak tambahan seramai 14,965 petugas kesihatan bagi tujuan menangani pandemik COVID-19.
4. Dalam masa yang sama, petugas bukan kesihatan termasuk dari agensi awam lain turut dimobilisasikan bagi menyokong perkhidmatan bukan klinikal. Antara skop tugas yang dilaksanakan adalah seperti berikut:
 - a) Melakukan proses pengesanan kes positif melalui telefon;
 - b) Menjalankan aktiviti pengesanan kontak melalui telefon;

- c) Membawa individu yang perlu dibawa ke Pusat Penilaian COVID-19 (CAC) untuk disaring dan ke pusat kuarantin bagi menjalani isolasi;
- d) Menguruskan dan mengemaskini data (*data entry*);
- e) Membantu tugas-tugas pentadbiran; dan
- f) Membantu petugas kesihatan di fasiliti kesihatan (memantau dan memberikan bantuan bukan klinikal kepada pesakit di wad).

5. Bagi memantapkan pelaksanaan skop tugas di PKRC MAEPS 2.0 dan hospital-hospital di Lembah Klang, Kementerian Kesihatan Malaysia (KKM) juga mendapat kerjasama daripada Angkatan Tentera Malaysia (ATM) menerusi atur gerak 1,000 anggota bagi membantu urusan logistik seperti membangunkan hospital medan, pengagihan tangki oksigen dan pengurusan jenazah COVID-19.

6. Selain itu, pendekatan yang diambil bagi mengoptimumkan penggunaan sumber manusia adalah seperti berikut:

- a) melaksanakan mobilisasi seramai 3,787 petugas kesihatan ke negeri, fasiliti dan lapangan yang lebih memerlukan;
- b) menempatkan secara sementara seramai 411 petugas dari agensi awam lain bagi membantu KKM; dan
- c) mendapatkan khidmat petugas sukarelawan seramai 4,435 orang untuk membantu kerja-kerja klinikal dan kesihatan awam.

7. Manakala Jabatan Perkhidmatan Awam (JPA) melalui Surat Arahan Penugasan Semula Secara Sementara Pegawai Perkhidmatan Awam Persekutuan Semasa Tempoh Proklamasi Darurat bertarikh 26 Januari 2021 telah melaksanakan penugasan semula secara sementara pegawai

awam ke agensi penerima yang bertanggung jawab penuh dalam pengurusan darurat dan pandemik Covid-19.

8. Penempatan pegawai adalah berdasarkan permohonan dan keperluan semasa di agensi penerima bagi melaksanakan sesuatu tugas yang ditetapkan termasuklah tugas *contact tracing* dan isolasi di KKM.

9. Sehingga 22 November 2021, seramai 4,813 orang pegawai daripada pelbagai Kementerian dan Jabatan telah terlibat dalam Penugasan Semula Secara Sementara Pegawai Perkhidmatan Awam. Agensi penerima yang terlibat adalah seperti berikut:

- a) Kementerian Kesihatan Malaysia (KKM);
- b) Kementerian Sains, Teknologi dan Inovasi (MOSTI);
- c) Majlis Keselamatan Negara (MKN);
- d) Kementerian Dalam Negeri (KDN);
- e) Agensi Pengurusan Bencana Negara (NADMA);
- f) Kementerian Perdagangan Antarabangsa dan Industri (MITI);
dan
- g) Kementerian Sumber Manusia (KSM).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 07 DISEMBER 2021 (SELASA)

SOALAN

Minta **MENTERI KEWANGAN** menyatakan bilakah Kerajaan bercadang untuk melaksanakan pelarasan bayaran Elaun Perumahan Wilayah kepada penjawat awam yang berasal dari Sabah yang sedang berkhidmat di Malaya dan Sarawak seperti yang telah diumumkan oleh Menteri Kewangan semasa menjawab soalan perbahasan Bajet 2021 tahun lepas.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

1. Kerajaan sentiasa prihatin dalam membela kebajikan penjawat awam khususnya melalui penambahbaikan kemudahan dan elaun dari semasa ke semasa bagi membolehkan mereka mendepani kos sara hidup yang semakin meningkat.
2. Untuk makluman Yang Berhormat, Elaun Perumahan Wilayah (EPW) atau kini dinamakan sebagai Bayaran Insentif Perumahan Wilayah (BIPW) merupakan satu kemudahan yang diberikan kepada pegawai yang bertukar wilayah antara Semenanjung, Sarawak, Sabah dan Labuan bagi membantu mereka menghadapi kos sewaan rumah yang berbeza di penempatan masing-masing. Penentuan kelayakan kadar adalah berpandukan kepada kadar sewa pasaran yang ditinjau oleh Jabatan Penilaian dan Perkhidmatan Harta (JPPH) di bandar atau kawasan yang mana letaknya pejabat pegawai yang berkenaan.
3. Merujuk kepada Lampiran C8, Pekeliling Perkhidmatan Bilangan 4 Tahun 2002, kadar BIPW yang diguna pakai pada masa kini adalah berdasarkan maklumat kadar sewa pasaran oleh JPPH pada tahun 2000. Selaras dengan itu, kajian penjajaran kadar BIPW telah pun dijalankan pada tahun 2014. Walau bagaimanapun, Kerajaan telah memutuskan untuk menangguhkan penyelarasan kadar-kadar BIPW berkaitan kerana melibatkan implikasi kewangan yang tinggi terhadap Kerajaan.
4. Oleh yang demikian, buat masa ini pelarasan kadar BIPW kepada penjawat awam yang bertukar Wilayah termasuk berasal dari Sabah yang sedang berkhidmat di Semenanjung, Sarawak dan Labuan sedang diteliti dengan terperinci melalui Kajian Rasionalisasi Elaun Perkhidmatan Awam yang sedang dilaksanakan oleh Jabatan Perkhidmatan Awam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : DR. KELVIN YII LEE WUEN
[BANDAR KUCHING]**

TARIKH : 7 DISEMBER 2021 (SELASA)

SOALAN

DR. KELVIN YII LEE WUEN [BANDAR KUCHING] minta **PERDANA MENTERI** menyatakan rancangan dan dasar Kerajaan mengenai dasar pemilikan dan penjualan saham Bumiputera di bawah Rancangan Malaysia Ke-12 dan bagaimana ia dapat membantu golongan Bumiputera secara jangka masa panjang termasuk golongan bumiputera di Sabah dan Sarawak.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Dasar Ekonomi Baru (DEB) telah mensasarkan pencapaian pemilikan ekuiti korporat Bumiputera adalah sekurang-kurangnya 30%. Sasaran ini diteruskan dalam Model Baru Ekonomi dan seterusnya dalam tempoh RMKe-12. Walau bagaimanapun, pemilikan ekuiti korporat Bumiputera masih belum tercapai setakat ini.
2. Seperti yang telah diumumkan dalam pembentangan RMKe-12, pemilikan ekuiti sektor korporat berasaskan nilai pasaran pada tahun 2019 bagi pegangan Bumiputera adalah 17.2%, bukan Bumiputera 25%, asing 45.5% dan nomini 12.3%.
3. Dalam memastikan pemilikan ekuiti Bumiputera agar terus mampan, Kerajaan telah memperkenalkan strategi dan inisiatif pemilikan ekuiti sektor korporat Bumiputera termasuk untuk membantu golongan Bumiputera di Sabah dan Sarawak seperti berikut:
 - i. Mengkaji semula strategi pelaburan antaranya, melalui cadangan untuk memperkenalkan kerangka jaringan keselamatan ekuiti;
 - ii. Mempertingkatkan literasi pelaburan antaranya, melalui kerjasama antara institusi Bumiputera seperti Permodalan Nasional Berhad (PNB), MARA dan Ekuiti Nasional Berhad (EKUINAS) dengan Suruhanjaya Sekuriti dan Bursa Malaysia; dan
 - iii. Memantapkan peranan syarikat milik Kerajaan (SOE) sebagai pemboleh daya bagi pemilikan ekuiti Bumiputera. Ini akan

dilaksanakan antaranya, dengan memudah cara penyenaaraian lebih banyak syarikat awam tersenarai (PLC) Bumiputera dengan menambah baik program sedia ada.

4. Berhubung cadangan kerangka jaringan keselamatan ekuiti yang akan diperkenalkan, cadangan ini tidak akan mengambil hak kepentingan kaum lain, tidak akan mengehadkan pasaran ekuiti Bumiputera dan tidak akan membuka peluang untuk dieksploitasi oleh Bumiputera lain. Sebaliknya, ia adalah untuk memastikan sebarang penjualan saham dan syarikat Bumiputera masih kekal dalam pegangan Bumiputera dan tidak terhakis. Penentuan harga sesuatu saham juga ditentukan oleh permintaan dan penawaran di pasaran terbuka.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN PRABAKARAN A/L M
PARAMESWARAN [BATU]**

TARIKH : 07 DISEMBER 2021 (SELASA)

SOALAN

Minta **PERDANA MENTERI** menyatakan adakah Kerajaan mempunyai rancangan untuk menyerap pekerja kontrak Kerajaan di sekolah dan hospital menjadi pekerja tetap Kerajaan seperti sebelum tahun 1997 memandangkan satu kajian dari Jaringan Pekerja Kontrak Kerajaan (JPKK) mengatakan beban ditanggung oleh Kerajaan selepas pengswastaan lebih tinggi dari sebelumnya dari segi penjimatan wang dan kebajikan sosial pekerja.

JAWAPAN

**DI JAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan yang Dipertua,

1. Pekerja kontrak yang dimaksudkan oleh pihak YB **adalah pekerja yang diambil bekerja oleh syarikat-syarikat swasta yang mendapat kontrak Kerajaan** untuk menjalankan atau memberikan perkhidmatan seperti khidmat pembersihan dan khidmat kawalan keselamatan di premis-premis Kerajaan seperti di sekolah dan hospital. Sehubungan itu, Kerajaan tidak berhasrat untuk menyerap para pekerja kontrak ini ke dalam perkhidmatan awam memandangkan mereka adalah pekerja swasta.

2. Walau bagaimanapun, sekiranya pekerja-pekerja ini berminat untuk memasuki perkhidmatan awam, mereka perlulah memenuhi syarat-syarat semasa yang ditetapkan oleh Suruhanjaya bagi skim perkhidmatan yang bersesuaian. Pemohonan boleh dibuat dengan menggunakan Sistem Pendaftaran Pekerjaan Suruhanjaya Perkhidmatan Awam Malaysia (SPA9) melalui Portal Suruhanjaya Perkhidmatan Awam Malaysia manakala maklumat jawatan-jawatan yang ditawarkan boleh dirujuk melalui Portal Suruhanjaya Perkhidmatan Awam Malaysia di bahagian Syarat Lantikan/Gaji/Deskripsi Tugas.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : PUAN ALICE LAU KIONG YIENG [LANANG]

TARIKH : 07 DISEMBER 2021 (SELASA)

SOALAN

Minta **PERDANA MENTERI** menyatakan:

Jumlah permohonan Bantuan Khas COVID-19 (RM100 sehari) dan Bantuan Khas Pengurusan Kematian COVID-19 (BKPC) dari Sarawak yang telah diluluskan oleh NADMA dan berapa jumlah dana telah dibelanjakan serta apakah punca utama permohonan bantuan ditolak walaupun dilengkapi dengan maklumat-maklumat dan dokumen-dokumen sebagaimana tercatat dalam syarat-syarat.

JAWAPAN

**DI JAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

- a. Sehingga 6 Disember 2021, sebanyak 1,773 permohonan yang beralamat dari negeri Sarawak telah menerima bantuan khas COVID-19 berjumlah RM2.054 juta. Manakala, bagi Bantuan Khas Pengurusan Kematian COVID-19 pula, seramai 465 orang waris bagi kes kematian di Sarawak telah menerima bantuan berjumlah RM2.235 juta.
- b. Punca permohonan ditolak bagi bantuan khas adalah pemohon bukan warganegara, tidak bekerja atau tidak mempunyai pendapatan sebelum dikuarantin. Manakala bagi bantuan khas pengurusan kematian adalah kematian bukan warganegara dan bukan disebabkan COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : TUAN CHAN FOONG HIN [KOTA KINABALU]

TARIKH : 7 DISEMBER 2021 (SELASA)

SOALAN

TUAN CHAN FOONG HIN [KOTA KINABALU] minta **MENTERI PERTANIAN DAN INDUSTRI MAKANAN** menyatakan mengapakah pengeluaran *granulated urea* Petronas dari *Sabah Ammonia Urea Project* (SAMUR) di *Sipitang Oil and Gas Industrial Park* (SOGIP) kesemuanya dieksport ke luar negara sehingga Sabah terpaksa mengimport dari China bahan mentah tersebut yang digunakan untuk pembuatan baja pertanian.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Kenyataan bahawa kesemua pengeluaran urea butiran (*Granular Urea-GU*) dari SAMUR hanya dieksport adalah tidak benar. PETRONAS melalui anak syarikatnya, *PETRONAS Chemical Group Berhad* (PCG) ialah pengeluar baja urea *granular* tunggal di Malaysia yang turut menjual baja urea *granular* dari SAMUR ke Pertubuhan Peladang Kebangsaan (NAFAS) dan lain-lain pembeli tempatan sebagai pemborong dan seterusnya dibekalkan kepada pembekal runcit dan akhirnya kepada pengguna akhir (*end-user*) baja tersebut.
2. Urea *granular* hanya merupakan salah satu komponen baja yang membekalkan sumber *Nitrogen* (N) di mana PCG adalah pengeluar tunggal di Malaysia. Komponen lain baja seperti sumber *Phosphorus* (P) dan *Potassium* (K) kesemuanya diimport kerana ketiadaan sumber tersebut di dalam negara.
3. Dari Januari sehingga September 2021, NAFAS telah membekalkan sebanyak 9,695 tan metrik baja urea *granular* dan baja NPK di mana baja urea *granular* diperolehi dari SAMUR bagi kegunaan terus tanaman padi Pertubuhan Peladang Kawasan (PPK) Sabah. Di samping itu, baja NPK NAFAS yang dikeluarkan daripada Malaysian NPK Fertilizer Sdn Bhd (MNFSB) juga menggunakan sumber urea *granular* dari *PETRONAS Chemicals Fertilizer Kedah* (PCFK) dan juga dibekalkan kepada pengguna di Sabah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN GOBIND SINGH DEO [PUCHONG]

TARIKH : 9 DISEMBER 2021 (KHAMIS)

SOALAN

TUAN GOBIND SINGH DEO [PUCHONG] minta **PERDANA MENTERI** menyatakan sama ada Kerajaan akan meminda undang-undang untuk mengasingkan tugas Peguam Negara dengan Pendakwa Raya dan sekiranya ya atau tidak, sebab-sebab untuk keputusan itu.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, pada ketika ini Kerajaan melalui Jabatan Peguam Negara telah menjalankan Kajian Pengasingan Peranan Pendakwa Raya dan Peguam Negara yang merupakan inisiatif di bawah Tonggak 1 Kajian Separuh Penggal Rancangan Malaysia Kesebelas. Inisiatif tersebut juga turut dimasukkan sebagai Perkara 4.1.5 Pelan Antirasuah Nasional (NACP) 2019-2023. Kajian terperinci tersebut telah melihat amalan terbaik global dan mengkaji secara mendalam sistem dan struktur pendakwaan di 9 buah negara.

Hasil kajian tersebut telah dimuktamadkan dan cadangan pindaan Perlembagaan serta undang-undang lain yang berkaitan juga telah dikenal pasti. Turut disediakan dalam laporan kajian tersebut ialah struktur Pejabat Pendakwa Raya yang akan ditubuhkan kelak. Seperti YB sedia maklum inisiatif ini turut berada dalam NACP dan tempoh pelaksanaan NACP adalah sehingga 2023. Apabila laporan kajian ini siap sepenuhnya, ia akan dibentangkan kepada kerajaan semula untuk keputusan sama ada akan melaksanakan agenda yang berkaitan cadangan memisahkan fungsi Peguam Negara dan Pendakwa Raya.

Memandangkan cadangan pemisahan ini memerlukan pindaan kepada Perlembagaan Persekutuan, maka Kerajaan perlu berhati-hati dalam perkara yang menyentuh kuasa Pendakwa Raya di bawah Perkara 145 Perlembagaan Persekutuan dan keanggotaan Pendakwa Raya dalam Suruhanjaya Perkhidmatan Kehakiman & Perundangan di bawah Perkara 138 Perlembagaan Persekutuan.

Sekian, terima kasih.